

四庫全書

經部

欽定四庫全書

經部
四書因問卷二

詳校官給事中_{臣戴璐}

刑部郎中_{臣許兆椿}覆勘

總校官庶吉士_{臣倉聖脉}

校對官學正_{臣常循}

謄錄舉人_{臣徐元扆}

謄錄監生_{臣許懷}

欽定四庫全書

經部八

四書因問

四書類

提要

臣等謹案四書因問六卷明呂柟撰柟字仲木號涇野高陵人正德戊辰進士第一人官至南京禮部右侍郎謚文簡事蹟具明史儒林傳是編記其門人質問四書之語大學中庸各一卷論語孟子各二卷然其中稱柟為先

生又原本先生字或跳行似乎非桷自作卷首有其門人魏廷萱等校刊字當即廷萱等所記也其書大學從古本次序中庸亦從古本分章所說多因四書之言推而證諸躬行見諸實事如因講八佾舞於庭章而指在座門人衣服華靡者曰此便是僭之類皆開示親切不徒為訓詁空談桷文集佶屈聱牙純為偽體而其解四書平正篤實乃如此蓋其

文章染李夢陽之派而學問則宗法薛瑄二
事淵源各別故一人而如出兩手耳乾隆四
十三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

四書因問卷一

明 呂柟 撰

大學

介問大學舊本云何曰言大人者之學其道在明此明德以親愛下民而止至善也夫至善則所止之地也非先知之則不能得也故有先後焉蓋所止之地皆物也則有本末盡止之功乃事也則有終始能知所先後則物本可得而兼末不難事始不亂而厥終自考去道伊

過矣其先後者何古之欲明明德於天下者先治其國
以下言先也物格而后知至以下言後也能如是則能
明明德以親民而止於至善矣斯大學之道也然其所
謂格物致知誠意正心修身齊家治國平天下者又非
一言能盡其義故下文又旁通其情焉然皆以釋明明
德親民止至善也止至善獨言明明德乎曰明德而不
能親民非明德也能親民矣而未能止至善亦非明德
也

其曰格物致知者何曰言物非在外者也皆關此身焉耳故自天子至於庶人壹是皆以修身為本若其本亂而末治者否矣蓋其所厚者薄而其所薄者厚未之有也誠知此身為本所當厚也則心不他用世無剩物日無泛事而其知至矣故曰此謂知本此謂知之至也此謂格物致知之說也

其曰誠其意者何曰言在禁止自欺惡惡如惡惡臭好善如好好色也是蓋遜志以求而不問名於外故能自

慊然其誠偽我知之而已故君子必慎其獨也不見小人間居為不善乎見君子而後厭然揜其不善而著其善人之視已如見其肺肝矣然則何益哉此誠於中必形於外故君子所以謹其獨也且惡積於中非但一人見其肺肝蓋十目十手所指視也不謹其獨可乎夫有財之富則潤屋矣無欺之德則潤身而心廣體胖矣故君子必誠其意以謹其獨而不自欺可也況乎至誠而不動者未之有也彼淇澳之詩言君子盡切磋琢磨之

功極瑟僎赫喧之盛而造乎盛德至善之誠則當世之民不能忘也豈惟當世彼烈文之詩言前王德成於已後世之人親賢樂利各得其所雖沒世不能忘也豈有他哉皆由誠意耳故康誥言文王克明德太甲言成湯顧諟天之明命帝典言唐堯克明峻德皆自明此至誠之盛德耳然誠意之功又不可間雖施諸民亦然故盤銘之日新康誥之作新民文王詩之新命言君子內不愧已外不愧人仰不愧天無所不用其誠而造其極也

是何也誠者人之所當止不誠則無物矣故玄鳥緡綿之詩云爾也然能止於誠而無入不自得者惟文王為然故其詩言緡熙敬止而仁敬孝慈信各臻其極也於是孔子又因止信而言聽訟猶人不足貴也必也使無訟乎蓋無情而不誠者不得盡其偽辭則以吾之誠意大畏其志而人信之也故曰此謂知本也夫古人言明善誠身然誠身實所以明善即所以誠身故格物格物以修身為知至而此以誠身為知本也曰若是則程子

定本何以克明德以下釋明明德盤銘以下釋親民邦
畿以下釋止至善乎曰自格物以至平天下固為釋此
三者而設若又取此克明德以下釋之不亦複且亂乎
又何須用八者也且古人之立言也論理不論文今以
其有明字多者釋明明德有止字多者為釋止至善又
取新字多者以釋親民而改親民為新民立言者恐不
若是泥也曰若是則夫誠意者未及乎正心修身何以
遽及於民至有沒世不忘之說乎曰噫此腐儒之說也

誤人甚矣從是言也則誠意者必不接一物閉目掩耳而後可乎平天下者必擾擾於一世離形去心而後可乎故古之人言意便及天下言天下便本諸意終始本末一以貫之但其序自此而先耳若是則釋誠意之辭不亦煩乎曰八者之事雖各有攸當論其功力皆本諸誠意蓋格物雖在先亦屬致知不及誠意力行之為難也能乎此則正心以下如水之沛然矣其有不得其宜者則亦斟酌損益之間禮樂制度之際耳故雖九章之

心誠求之十章之曰德曰仁義曰好惡者皆自是而舉之也故是章或言其功或徵諸事或本諸體或稽諸效反復推演不一而足雖平天下之意亦宛然見矣

其曰所謂修身在正其心者何曰言身有所忿懣恐懼好樂憂患之偏者即心之不得其正也蓋意雖實心不正難觀即形於身者可見耳夫心不在於正豈惟見忿懣恐懼形於身者之偏哉其極至於視聽不見聞飲食不知味矣可不慎乎故曰此謂修身在正其心

其曰所謂齊家在修其身者何白言人於所親愛賤惡畏敬哀矜傲惰者有所偏焉其心雖正亦身之不修不足以理家也蓋此五者雖形於一身之小而實接乎一家之衆故也若夫好必知其惡惡必知其美非身修家齊者不能不亦少乎故諺有之曰人莫知其子之惡莫知其苗之碩此偏於親愛者之效也獨舉斯二者人之處家好愛而易私者莫如子與苗此而能克則無助苗之長勿勞之愛矣賤惡以下可易能也不然家其能齊

乎故曰此謂身不修不可以齊其家

其曰所謂治國必先齊其家者何曰言其家不可教而能教人者無之故君子之道不出家而能成教於國焉故家之孝弟慈者即國之所以事君事長使衆也然其所謂孝弟慈者皆本於誠焉蓋自誠意中來也故康誥曰如保赤子心誠求之雖不中不遠矣未有學養子而后嫁者也夫能誠於為善而一家仁讓則一國興仁讓誠於為惡而一人貪戾則一國作亂其機如此此謂一

言僨事一人定國也故堯舜帥天下以仁而民從之桀紂帥天下以暴而民從之其所令反其所好之誠而民不從也是故君子有諸已而后求諸人無諸已而后非諸人所藏乎身者不恕不本於誠焉而能喻諸人者未之有也故曰故治國在齊其家其下三詩則咏嘆其意以警發乎人而又以證之也其誠意溢然矣故曰此謂治國在齊其家

其曰所謂平天下在治其國者何曰言即興孝興弟不

倍恤孤以見秉彝人心所同不可使有一夫之不獲也是以君子有絜矩之道以處之絜矩之義不過使上下四旁均齊方正而已然其用則在好惡也故絜矩用於好惡則民以為父母如南山有臺之云也絜矩不行於好惡而偏焉則為天下之戮如節南山之云也故文王之詩言商先王能絜矩而得衆得國商後王不能絜矩而失衆失國不亦明徵乎然欲行絜矩必以德為本又自誠意明德而逝之也故自君子先慎乎德以至亦悖

而出皆言有德而能絜矩與不能者之理財也康誥楚書舅犯之言則又徵之爾證之者言天命人心皆歸于德而不在于財也自秦誓以下至菑必逮夫身則又言能絜矩與不能者之用人也君子有大道則總言理財用人其曰大道即絜矩爾夫理財雖貴于內本外末然財亦不可廢也故生財有大道不在詭計也惟在乎務本節用而財自足又何必外本而內末哉然又恐有國家者專務其財也則又言仁者以財發身以下則理財

之道非仁義不足以盡之夫理財用人雖皆治天下之
目用人者又理財之本也故自畜馬乘以下則又言君
子不察于利非若小人之專務財而不以義為主也并
上言惟仁人能好惡人則理財用人之道亦非仁義不
足以盡之是故絜矩者法也仁義者道也好惡者用也
理財用人者目也仁以本之義以質之絜矩以處之好
惡以行之用人以先之理財以後之則孝弟慈之道周
于天下矣然其曰德曰仁義曰好惡者則又皆本于誠

意正心修身焉故曰本末一貫始終一理明德即所以親民明德而能親民無所雜焉所謂止至善也

續因問

章詔問大學之道先生曰只當以明明德為綱蓋明德而不能新民也不算他明德故新民可兼在明明德之內若明明德以新民少有一毫私欲夾雜亦未足為至善是必盡乎天理之極而無一毫人欲之私斯為止至善矣若夫三綱領之說恐太涉于分析大學之道只在

一箇明明德都盡了後來說明明德于天下說盛德至善都只是說明德更不說新民可見王標曰九章之心誠十章之慎德亦為是乎曰然

胡炳問明明德明字莫只是天地生生之理惟虛故靈虛靈故明否先生曰這也是正謂明德只是箇天地陰陽之氣清通之極萃于吾心者

炳問定靜安慮靜是心不妄動畢竟是心靜方纔定如何說定而后能靜先生曰心之所以不靜多緣是念頭

一差無所定向故心動于聲色動于貨利動于功名理欲交戰不能寧一若于念頭上一定了方纔得靜也安只是靜到純熟處何以先言知止曰大學之道未有不先知而能行者故自物有本末以下泛論其理當先于知也欲明明德於天下以下證以古人之事惟先於知也

問格物之格有說是格式之格謂致吾之良知在格物格字添出窮究字樣來何如先生曰格物之義自伏羲

以來未之有改也仰觀天文俯察地理遠取諸物近取諸身其近取即是窮格之義格式之格恐不是孔子立言之意

詔問格物先生曰這個物正如孟子云萬物皆備於我物字一般非是泛然不切于身的故凡身之所到事之所接念慮之所起便是物皆是要格的如言便有言之理在官言官在朝言朝與父兄言言慈愛與子弟言言事父兄視便有視之理或視上於面則傲下於帶則憂

傾則姦坐如尸有坐之理立如齋有立之理推此類可見無一處非物格物之功無一時可止息得的聶蘄曰夜睡心下有所想像念頭便覺萌動此處亦有物可格否先生曰怎麼無物可格君子無終食之間違仁造次必于是顛沛必于是亦皆是格物雖夢中亦要驗格也易泉聶蘄辨論格致及德性之知與聞見之知同異先生曰此乃合内外之道也張子嘗云誠明所知乃天德良知非聞見小知而已後人小大同異之論皆本諸此

殊不知張子之言必為偏于聞見者發也自予言之只顧人之求知者何如耳使求知者皆為德性則聞見非助我者耶如舜聞一善言見一善行若決江河則與德性渾融為一此等聞見惟恐其或少耳若聞見無與於德性之知則祇為記誦涉獵之資誠為小而已正德間有一侍郎博學多記冢宰薦一學士用一故事以問侍郎乃遂背誦不止冢宰止之曰不用許多只用前一二言足矣若此等聞見不過記誦於身心何益且鳶魚自

常人見之一物而已子思深有所見便以明道之昭著
於上下程子又謂子思喫緊為人處活潑潑地皆是見
道之真而非滯於聞見者也此則合內外而一之者夫
豈可槩以聞見為小哉故曰只顧人之求知者何如也
象先問格物是格得一物餘可類推否先生曰須是著
一件格格得熟時纔可類推若初學只說格一件百件
便了是如佛家空守虛寂而謂萬物可照如何則可
康恕問格物之功如鳥獸草木之類亦須要格否也先

生曰所謂格物在隨時隨處格然鳥獸草木元初與我
也是一氣生的怎麼不要格如伏羲亦嘗仰觀於天俯
察於地中類於鳥獸草木之情但遠取諸物必須要近
取諸身纔是若離却己身馳心鳥獸草木上格做甚
王獻蓋問學者必先致知否先生曰不先致知則德忠
朝夕往來講論為何曰致知先人事乎曰除了人事焉
有道理這是分不得的看書須要體之于身驗之於事
方有益若但䟽解字義而已殊無所得

自天子至於庶人壹是皆以脩身為本是舉其切要言之脩身即明明德也雖至平天下章言先慎乎德言仁義忠信皆明德之謂可見大學一書只是格致誠正以脩身而明明德也詔曰大學舊本以此釋格物致知信乎曰然

附錄章聶二論

章詔曰致知是開廣聰明推極吾心之知所謂致良知亦是聞知先生曰如孟子盡心知性之謂盡心是

致知之事知性是格物之極格物之義時說紛紛如
或問所謂今日格一物明日格一物此自其積累言
之若學者乃謂必待今日格一物明日方格一物則
何時可了若又曰即凡天下之物莫不因其已知之
理而益窮之以求至乎其極此又在渾淪處說不知
從何端而起若以格為正乃後一層工夫與正心相
類恐亦難說惟先生曰物是萬物皆備於我之物格
是就身之所至事物所接耳目所及念慮所起皆是

須就要辨別是非邪正猶要專切若不專切方用心於此忽馳心於彼物何如可格且如一坐立之間即便可做工夫然必以吾心德性之知為之主廣聞見以擴充之如伏羲仰觀俯察遠取諸物即近取諸身之類皆是又如親賢讀書開發聰明亦其中一件是格一事一物之理則一事一物之知便可致矣積久自然貫通此方有下手做工夫處如是可使此心常存所謂必有事焉者端不外此論者輒曰只求之吾

心之良知足矣更不藉聞見必以格為正恐太執泥
高遠詔不獲已乃辨之曰人生十五歲入大學而格
物致知又大學入門始事本之於心此本體之明不
待言矣然氣拘物蔽而天下義理無窮若謂更不少
藉見聞只閉門澄心便了盡天下之理恐古之聖人
亦有不能然者且以舜之大聖盍只索之良知而自
足耶乃猶自耕稼陶漁以至為帝無非取諸人者不
知何也易曰君子多識前言往行以畜其德書曰學

於古訓乃有獲詩曰如切如磋正講習討論之事大學引之以釋明明德者聖如孔子猶好古敏求博文約禮況人不皆生知之聖世固有童而習之至終其身而於義理無所得者安可言之易易如此而槩以生知之事誣吾人耶謂畧不待於聞見耶或曰千蹊萬徑皆可以適國子何執耶詔曰然與其從迂道遠道而行莫若從平平之大道於適國尤便也况道理乃天下公共之物非一人之私論者只貴虛心正不

可執一說以求勝也朱子集諸儒之大成其所論止一二未甚精後人猶得以議之矣世之儒者見道未如朱子辨論太高遠安知後人更無致議耶詔淺陋無知祇服師訓因友辨說以自識之非好辨也

蘄嘗與諸友以大學聖經請教於先生先生曰此孔門切實之學於學者極有力諸生宜心驗身體庶其有得蘄佩服之每於日用切已處觀省真有渙然如醉之得醒者而二三士友尚不免有疑或舊有所執

着甚至窮辨蘄遂述先生教言以與二三友共紬繹
焉夫大學之道雖有三言實重於明明德蓋新民亦
明德以新之也止於至善則明德以新民之極也知
止而後有定至則近道矣特舉兩知字為言者明學
以知為先也古之欲明明德於天下至國治而後天
下平則詳其中之條件示學者以用力之地惟在先
知明德之至善也觀明明德於天下一言可見其格
物云者格窮至也物事理也程子所謂至其理也即

日用間身之所值事之所接念慮之所到切思其理而不為泛焉之思則凡物之理皆會於吾心之良知知其有不致乎其有以正訓格謂正其不正以歸於正似矣獨不可以言正心矣乎又有少變其說以去私欲為格似矣獨不可以言誠意矣乎蓋格物致知誠意正心脩身即一念慮所動之處一時刻所用之功其間但有先後相承之節次非必今日格物致知明日纔誠意後日纔正心脩身也今之學者乃疑其

先後為支離遂於格物上強生一意見欲便了此下面數事則當時聖人只說格物致知便了又何必言誠意正心脩身也夫格物固非外意心身而有物可格知可致孟子所謂萬物皆備於我是也然其所謂反身而誠者雖其學已成後之事其反身之前格致誠正皆不可少也故繼以強恕而行云程子有謂立誠意以格之者經文誠意畧不同猶曰即切己之事專意以格之不可泛及他事云爾豈程子又置誠意

於格物之先而亂聖人立言之序耶又有附會之者
曰格物為去私欲只緣人有私欲間雜則物不能格
知不能致既如其說則去私欲之先又將尋討何等
工夫來也今之執着之私未能去正惟於聖人全文
直指未能通貫也又謂程子之至乃謂以身至之分
明屬行殊不知程子之至即周易之知至至之其訓
易曰知至至之主知知終終之主行則實以至屬知
也然又非程子意也易言知至至之可與幾也幾即

意也可與幾言能幾也分明知在意先矣又謂知字
本孟子之良知後儒以知識粗看了所以知行不能
合一嗚呼是將聾人之聰而鼓已之簧耶蓋人心無
兩樣知蘄雖愚昧不敢謂少有所知者非性所有也
厚誣先儒之言知識為非良知無乃先自誣乎蓋物
我一理察識於物而開明心之知吾之知以致非自
外也內無良知外固無從而有知識也是故君子多
識前言往行以畜其德凡以此也蘄故曰人心無兩

樣知也又謂古本以修身釋格物是格物以行言無疑噫是又不知為本之說也其曰修身為本者非謂修身即格物也猶云格物以修身為本也若泛泛焉窮至天下之物而不切於修身是則所謂物馳而非所謂格物也是安可以古本而異今文也其本亂末治之說正承為本之言而及於家國天下要皆吾身之推而物之所當格者也大學之教其詳切如此統而言之若網之有綱明明德是也析而言之若綱之

有目格物致知誠意正心修身齊家治國平天下是也此目不混於彼目而未始相離也衆目同領於一綱而未始不相通也此孔門切實之學非高遠粗淺也學者能自得焉將無時無處而不用其力矣

標問作新民作字先生曰是以明德之懿而顯設於條教法度之間以為鼓舞之具故謂之神曰聖人神道設教而天下服以神言似涉於幽了曰自吾心之所有者推之以及人而人自無不化何神如之

炳問學不止於講習討論否先生曰聖門教人只在博文約禮博文即格致之事如切如磋是也約禮即誠正之事如琢如磨是也講習討論便是格致事問瑟何以訓嚴密憫何以訓武毅曰聖人之學戒謹不覩恐懼不聞無一毫空隙處少有空隙則私便投隙而入故少有私欲萌動便致武毅直是克去他如將兵克敵方謂之武必欲克倒他工夫不已方謂之毅聖賢做工夫直是如此

詔問誠意只在為善去惡戒自欺而求自慊否先生曰然自欺則偽與前所格致者背也自慊則誠與前所格致者合也其幾則在慎獨又曰念慮之起覺得善惡就是獨必好必惡就是慎

王獻蓋問誠意之功亦難矣大學意誠之後猶云心不在焉何也先生曰此問甚好非曾用力者不能及此蓋誠意是辨其孰為善而實好之孰為惡而實惡之意誠之後則心中皆是善的但未至而迎已去而留雖是善

却不能中故心不在者心失乎中也不中故視不見聽不聞食不知其味身不可得而修矣

象先問學者須是要自慊這自慊的光景是如何先生曰此須要真無悔吝纔得好善真如好好色無不好者挽之於中而此心無遺悔惡惡真如惡惡臭無不惡者拒之於內而此心無遺吝仰不愧天俯不忤人然後謂之自慊此便是顏之見大心泰孔之樂在其中這便可想自慊的光景

詔問大學誠意至好善如好好色惡惡如惡惡臭足矣
何以又要正心修身工夫先生曰意乃心之萌動處好
善惡惡之誠正心固不外此然此猶自其幾言之若心
則全體大用無所不具至此則無惡可言止於其善者
有太過不及失正處爾但日用間所起之念所應之事
紛紜雜擾於前不無忿懣恐懼好樂憂患之情若未至
而先迎既至而不化一有或偏則心遂不正矣故曰心
統性情必性情舉得其正而後心可正也若修身之事

尤當直內方外然親愛賤惡畏敬哀矜傲惰與身相熟
後便易偏了如處家人僮僕既熟後不見其失故接於
身者處之失當身其何以修乎必如張戩處盜筍皮人
方見不偏

問忿懣恐懼憂患三者其情若同而好樂一焉何也先
生曰三者亦不同恐懼在事變倉卒之臨憂患在平時
雜念之起忿懣則程子所謂人情易發而難制者惟怒
為甚蓋與好樂本四件也

又問忘怒觀理理有是非非則已矣是亦當發乎曰理當怒而不怒非是也又問怒雖當發若能觀理則氣亦平而分數不至太過乎曰然

易泉問大學工夫恐太分析意若說誠意後復有正心工夫正心後復有修身工夫恐太分析先生曰若無次第工夫傳文如何說此話且如你們歷事知得該去便是格物致知若分明知得該去意懶不去便是不誠意了若自強而去不欺所知便是誠意雖去矣而心猶或

不平少有忿懷之意則心亦不正心中雖無不平或所
遇司官加些顏色少些容貌這等時候其不講氣而傲
惰者鮮矣又或以己之愆期也致使司官呈堂他日引
見憚其勢位尊嚴或有惡聲厲色之加能使顏色不變
常手足不失措者斯為不辟於畏敬矣即此一事而觀
且不說朝廷三揖在列金革百萬之衆在前則又不知
如何此可見誠意後還有許多工夫

聶蘄問好樂憂患與畏敬哀矜等類何所分別且心正

後身何以猶有偏處先生曰好樂自心之存主處蘄意尚在己心上畏敬自身之臨接處說已及人了所以大學工夫心正後卒然臨事時工夫不密不覺猶有偏辟處蘄意尚未釋然少頃先生坐後帷屏被風吹側先生猶危坐諸生中或有愕然失聲者或有勃然失色者甚或有奔扶至失手足者先生曰此便是畏敬而辟此便是身之卒然臨接處即此而觀好樂憂患得正之後而畏敬衰矜不免猶有所辟豈可不加察諸生心始快然

矣

象先問家不齊只舉苗與子二者為言如何先生曰家之所接者人而人莫親於子所用者財而財莫急於苗故舉二者以見其餘此而能當則雖九族之衆百貨之廣皆易易耳

象先問治國在齊家如何先生曰首言治國原於家其本在一誠次言治家可化乎國其用在一恕三引詩皆咏嘆乎此耳孟子所謂反身而誠強恕而行皆本於此

先生因講如保赤子心誠求之顧謂象先曰汝那裏有箇潘正郎希平陞荊州府予往問之希平因請教予見希平嘗置其子於樓上讀書因謂之曰希平視荆民如樓上之子可矣希平請問其所以予謂希平視其子登樓則使人扶之下樓則使人挾之時其飢餽之食時其渴飲之漿時其書聲不聞則扑之恐其或惰時其書聲不絕則節之恐其或勞視荆民如己子有何不可希平曰州縣之廣安得人人視之如己子予謂州縣之吏有

如子這樣心的把子之心事付託他亦有無子這樣心的把子之心事詳告他以為殿最他又何不可希平又謂荊州適饑饉時時賦稅既免而祿米廩餼之類又不可缺歲辦既蠲而往來供億之類亦不可少此等處却如之何予謂子之家無饗飧客無饋饌則亦求之樓上之子乎抑或別有處也然此還是謂視民如子的說話若如保赤子赤子却是箇無知不能言的視民如無知不能言之赤子則亦何所不至哉又言予鄉有劉先生

者曾作縣來凡民有罪別縣多是罰金帛他止是罰此米糧棗菜等物無事時令僧道等晒貯之後值年荒別縣民皆流離失所惟他這縣獨得生全這樣的人皆是心誠愛民如赤子故害未至而預為之防因謂諸生曰你們他日皆有安養元元之責這等心腸却不可不自今日預養

標問十章之傳先生曰絜矩是平天下之要所惡以下解絜矩之義也民之父母以下則能同其好惡而絜矩

之所以得赫赫師尹以下則不能同其好惡而絜矩之
所以失未喪師則能絜矩而與民同欲得衆得國矣儀
監之詩則不能絜矩而與民同欲失衆失國矣是以君
子必當慎其德而不可專利以奪民之欲也直至仁親
為寶皆言不可專利之意秦誓以下言惟仁人則能盡
好惡之正者見賢不能舉則次之好人所惡則不能絜
矩之甚者皆以言用人也君子大道則摠結焉尤其絜
矩得失之本也然其所謂外本內末似不必理財然亦

國用之不可無故以生財有大道終焉然生財之中又必本諸仁義焉夫平天下治之大法也不過理財用人二事而理財用人只是公好惡其歸只是慎德與夫仁義而已故孟子七篇言仁義皆本諸此

獻蓋問民之所好好之民之所惡惡之是平易近民否先生曰亦是民之好惡與我本不相遠人惟不能平易故相遠了若平易好惡便近民故曰樂只君子民之父母且父母生人皆可以為君子豈惟乾道之中而後有

二程夫子淳熙之中而後有晦庵夫子但人心私欲所蔽起了藩籬生了物我有了親疎立了異同胷中皆是一團私欲故不能為君子若能隨事精察漸克去撤了這藩籬忘了這物我一了這親疎合了這異同視天下之民毛髮骨爪疾痛疴癢與我相關涉好惡自與民同便可以為君子故曰一日克己復禮天下歸仁焉光祖問大道何在先生曰大道雖所包者廣不外於絜矩即明德之用也驕者矜高屬貴一邊恭者侈肆屬富

一邊惟其以貴自高則必與下民隔絕於人情畧無所切惟其以富自侈則但求自足其欲於人情初無所恤此所以失大道也大抵平天下之大道既明其德莫急於用人以理財註疏亦有好處朱子有采取不盡者合觀之亦可

聶蘄問絜矩先生曰矩是箇為方的器大之而及四海要之只在方寸謂之絜矩只是箇無不均平意思且如天下有樣有權勢的是一等有樣鰥寡孤獨顛連無告

者又是一等天下之人便有這幾等怎麼便得均平故堯典稱堯則曰平章百姓黎民於變時雍此便是能繫矩的象先因問天下亦大着怎麼便得均平如一先生曰此亦無大異術亦只是把這些財散與百姓便能得問百姓亦多着怎麼便能人人與他財也先生曰亦無大難事亦只是要有箇不要錢的官人便能得也問天下非是少這般人而莫之能用其咎安在先生曰此只是沒這箇臣苟有這個無他技休休有容之大臣則用人

以理財俱得其當天天下豈有不得所的道理問所以能用一個臣其要又在君否曰這更不消說了傳中謂仁人能好惡人又謂仁者以財發身故其要只在君心之仁所謂明德也凡視天下若不切己者只是不仁故與己不相干涉苟知得這些人生生之理無非天地生生之理則與我這些人元初只是一箇今又在長人之責豈忍置之於不得所的地面故張橫渠西銘却備言此道理然人所以不得生者只是無生生之具以為衣食

故只把這些財散與人使人有以為生則天下自平矣
絜矩不必拘拘以傳中次第言之便當以身任天下之
責欲行絜矩必先理財使民生遂欲理財以養民須要
用人欲用得其人須公好惡則善人在位不肖者屏去
舉賢必速不善必遠如是庶善惡知所勸戒若求大道
得失之幾則惟在於忠信驕泰而已

先生看書之秦誓至一个臣無他技處因嘆曰此最天
下治忽興衰所係書始二典而終秦誓見得須是無秦

誓妨賢病國的心胷方可做二典時雍風動的事業

四書因問卷一

欽定四庫全書

四書因問卷二

明 呂柟 撰

中庸

滋問中庸舊本云何曰子思子以明人而尊祖也人也者道也惟孔子為能盡之耳故道非外物自性而出耳由教而為道者戒慎恐懼以謹其獨則得率性中和之道而可以為天下大本達道也果致其極焉則位天地育萬物天命亦在我矣故曰君子中庸小人反中庸惟小人反中庸

故民之鮮能久矣民之所以鮮能者知愚賢不肖之過不及也夫道如飲食非過非不及人自不知味耳知者如舜之無過則何患道之不明賢者如回之無過則何患道之不行而自入於陷阱也勇者如君子中和不倚不流則又何患中庸不可能哉故索隱如知者過之行怪如賢者過之夫子不為半塗而不勇則又不已也是何也君子之道費而隱近自夫婦遠而至於天地聖人不能盡其大焉魚不能破其小然亦未嘗遠乎人也故人當以已之道治已

之身忠恕以為之方孝弟忠信以為之目則能素位而行
不願乎外其有不得亦正己而已不敢有怨於正鵠也然
而行之亦有叙焉妻子兄弟其始也夫道雖始於卑近而
其幽深通乎鬼神誠有不至鬼神可得而鑒矣豈可以兄
弟妻子卑近之處為可忽哉能盡之者其惟大舜文武周
公孔子乎大舜之大德得天文王之作述無慮武王周公
之達孝易於治國孔子之論政本於誠明其致一也其下
則又以誠明分天道人道而言凡以明孔子耳至誠盡性

以下申言性也致曲以下申言教也前知以下申誠則明也自成以下申明則誠也無息以下則言至誠功用之大與天為一也大哉以下則言誠之者功用之大與聖人為一也然聖人治天下之目則又有三重也君子學雖至於聖人而無位亦不可作禮樂焉况愚乎觀孔子可見矣蓋以君子三重之道一本諸身而知天知人以居天位然後能師表天下後世也然孔子雖不得位而其學則盡乎是矣蓋兼帝王天地之道而時出之孔

子其至聖乎然皆本於至誠焉孔子其至誠乎蓋自舜之大孝至此所謂脩道之教而孔子為獨聖也則所謂天下莫能載者孔子載之矣衣錦以下則又言君子作聖之功以至其極爾故曰子思以明人而尊祖也

敬問脩何以云品節曰道豈可云品節則何以謂之教曰猶自明誠謂之教爾戒慎恐懼及慎獨何以為二事曰既言慎獨矣豈又有二獨者乎蓋言獨雖不覩不聞雖莫見莫顯故君子戒慎恐懼以謹此獨爾是即脩道

之教也能如是則率性之道在我故有中和之說致中以位天地致和以育萬物然乎曰何必然天地位萬物育即天命也能盡性則得天命爾豈可析言耶不直曰性謂之中而曰喜怒哀樂之未發者何曰以喜怒哀樂專為情者固非以其未發專為性者亦非故舜曰人心惟危道心惟微允執厥中中何以為天下之大本曰外乎此不太過則不及皆非理也和何以為天下之達道曰私喜私怒行於一已不能行於衆人也

章詔問天命之謂性先生曰天命只是個氣非氣則理無所尋着言氣則理自在其中如形色天性也即是如耳目手足是氣則有聰明持行之性又問自天之賦與而言為命自人之稟受而言為性如何曰是以分為二矣問道教曰人率此性而出即是道脩為此道即是教猶自明誠謂之教也其曰君子戒慎恐懼者何曰此體道之要也不覩不聞只是虛靜之時若此心常惺惺然不敢怠忽便是戒謹恐懼問隱微即不覩不聞之時獨

即隱微乎曰然此正言所以戒懼之由也問中庸明道
乃以喜怒哀樂言者何曰人之一身只是一個氣與天
地相為流通天有陰陽舒慘人有喜怒哀樂故曰湛一
氣之本攻取氣之欲又問不以仁義禮智言者何曰喜
怒哀樂人所易見雖下愚不肖亦有之仁義禮智已自
在其中蓋體用一原之謂也問以中和而謂之大本達
道者何曰不然則有過中失正之弊喜或不本於天命
之性怒或不能必千萬人之同矣故致中和是自我而

致之不但言推極之也若位育是實說其理然必聖人在天子之位方有此功效之極若人之一身一家亦自有天地萬物顧人之所致中和大小如何耳問傳以位育分屬中和恐非子思本意要之中和一貫豈容分析乎曰然

大器問戒慎恐懼與省察只是個慎獨工夫否先生曰王介菴先生嘗言戒慎恐懼及慎獨是一個工夫王虎谷先生曰某只作兩個工夫做然予嘗以問劉近山先

生近山先生曰纔說一個工夫便是不曾用工然以今日吾輩各求於心靜坐體驗纔省察便涵養纔閑邪便存誠纔克己便復禮實非有兩事也豈不是一個工夫不然則天下有二獨矣世有以不覩不聞為理者則理豈在心外耶又以為人不覩不聞者則并其已而遺之其疎亦甚矣

問聖賢每每說性命來還是一個是兩個先生曰此正是易一陰一陽之謂道一般子思說自天命便謂之性

還只是一個朱子謂氣以成形而理亦賦還未盡善天
與人以陰陽五行之氣理便在裏面了說個亦字不得
陳德文因問夫子說性相近處是兼氣質說否先生曰
說兼亦不是却是兩個了夫子此語與子思元是一般
夫子說性元來是相近的但後來加着習染便遠了子
思說元是打命上來的須臾離了便不是但子思是恐
人不識性之來歷故原之於初夫子因人已墮於習染
了故究之於後語意有正反之不同耳

章詔問脩道之教如何先生曰戒懼慎獨便是脩道之功聖人為法於天下學者取法於聖人皆是張橫渠不云糟粕煨燼無非教也他把這極粗處都看做天地教人的意思此理殊可玩

先生曰戒懼慎獨存天理遏人欲兩件看恐還不是此只是一個工夫但獨處却廣着不但未與事物應接時是獨雖是應事接物時也有獨處人怎麼便知惟是自家知得這裏工夫却要上緊做如今日諸生聚講一般

我說得有不合處心下有未安或只隱忍過去朋友中說得有不是處或亦是隱忍過去這等也不是慎獨先生語意猶未畢何堅遽問喜怒哀樂前氣象如何先生曰只此便不是慎獨了我纔說未曾了未審汝解得否若我就口答應亦只是空說不是慎獨此等處須是要打點過未嘗不是慎獨的工夫堅由是澄思久之先生始曰若說喜怒哀樂前求個氣象便不是須是先用過戒懼工夫然後見得喜怒哀樂未發之中若平日不會

用過工夫來怎麼便見得這中的氣象問孟子說個仁義禮智子思但言喜怒哀樂謂何先生曰人之喜怒哀樂即是天之二氣五行亦只是打天命之性上來的仁義禮智隱於無形而喜怒哀樂顯於有象且切緊好下手做工夫耳學者誠是養得這中好了即當喜時體察這喜心不使或流怒時體察這怒心不使或暴哀樂亦然則工夫無一毫滲漏而發無不中節矣堅又問顏子到得發皆中節地位否先生曰觀他怒便不遷樂便不

改却是做過工夫來的到中節地位了

康恕問靜存動察先生曰靜所以驗動動所以合靜交相為用也故存養省察工夫只是一個更分不得

因講戒懼慎獨無兩段工夫先生曰做慎獨工夫亦先須講究如大學定靜安慮必先知止王材曰故格物致知而後可以誠意故誠意章纔言君子必慎其獨若不先知何者為善所當為何者為惡所當去則何以慎其獨也先生曰是正是我輩如今要講得明白明日臨事

庶乎不差

鄭若曾問動靜先生曰動靜以時而言亦以事而言靜字不是死的戒慎便是動矣獨則耳聞不得目見不得又無形容可狀當屬已若人不消說了慎獨無有作好作惡無纖毫私意便是某常講致曲即是慎獨子思推原學問大根本在慎獨故致中和便能位育天地萬物原同一氣來歷聖人自有中和學者必先慎獨而後有此

唐應德問觀喜怒哀樂未發之前氣象如何先生曰只是虛靜之時觀之屬知屬動只是心上覺得然其前只好做戒慎恐懼工夫就可觀也又問靜時小人與君子同否大器曰小人夜之所息不勝晝之所為渾是私意先生曰以有私意種子在此也若言靜與君子同則動亦可與君子同乎

易泉問到位天地育萬物却是難事先生曰位育不難還是致中和難怎麼見得難須是戒懼之意常存處已

如是處人亦如是在家如是在外亦如是今日如是日
日亦如是這等纔能致得中和纔可位育得天地萬物
諸生今日只要在致中和大學謂自天子至於庶人壹
是皆以脩身為本予謂中庸一是皆以致中和為本他
日得志在位建功立業固不消說不得志在下變化得
些風俗亦便是能位育天地萬物了這等看來天地有
大小萬物有多寡但隨已分量擴充去而中和却不可
不致

劉銑問君子之德而又能隨時處中如之何曰言君子能時時無不中耳道不行言知愚之過不及不明言賢不肖之過不及者何曰知者知之過足以迂人心賢者行之過足以惑人心愚不肖之不及不假言矣故不行不明然道猶飲食在人甚切近耳不及者自枵其腹而過之者自取其困也

象先問時中先生曰時中的地位儘難如孔子說夏時殷輅周冕韶舞有多少不同處與上大夫言便閭閻與

下大夫言便侃侃麻冕純儉便從衆拜上便違衆從下此皆是孔子的時中處顏子仰鑽瞻忽每在於此若他人要隨時或忘却中要執中或背了時看來這時中君子非是致過中和來的怎麼能得永年曰時中亦可分言否曰固不可分言然自有此脈絡如孔子祖述堯舜而又憲章文武方能酌古準今雖周公仰思亦是此物凡聖人因人變化對時育物皆可玩也

鄭若曾問人莫不飲食鮮能知味如何先生曰飲食知

味處便是道人各宜思之大器對不以飢渴害之曰然
適茶至若曾讓汪威先生曰此便是知味處汝要易見
道莫顯於此若曾曰如此何謂知味曰威長汝遜之故
也不如此只是飲茶而已汝資質暗合分明是道却
又不知聖人說水是道說門是道說衣服是道若褻褻
左手長右手短便不是今學者寬衣大帶裝成堂堂模
樣與道不相干且聖人顧諟天之明命滿目皆是道理
鳶飛魚躍活潑潑地大器問開目便錯了何謂先生曰

非禮勿視云云又問致曲心粗只是心不存否先生曰然必以集義為事自是勿忘譬如飲茶時如此不飲茶時亦勿忘此謂戒慎不覩汝們依我講着就此下手做去有着落有持循

章詔問舜之大智者何曰好問好察則無遺善不智而能之乎隱惡揚善則人樂告以善不智而能之乎擇之審用之至也無少遺失矣不可謂不智也此豈有所索隱者哉道何為而不行乎舜為天子得行其道於天下

反以仁言回者何也曰此孔氏之精義也舜有天下故
言知其行可知矣回在陋巷故言行其知可知矣舜與
顏回易地則皆然詔問舜之大智如何先生曰千古聖
賢道統之傳惟在於此如舜之好問好察皆出於心之
至誠無一毫勉強其所以然者何故只是欲天下百姓
各得其所欲天下百姓各得其所惟有此中可以近人
情合天理中雖具於吾之一心而散見於天下之人故
一人之善未得即一民之生未遂抱仁民之心者雖欲

不問察以求此中不可得已隱惡揚善執其兩端皆由是出故欲觀舜之大知者當先觀其欲並生之仁孟子曰舜由仁義行者以此後之學者執泥已見而訑訑自用豈惟其知之小亦以其仁之未聞耳夫子曰三人行必有我師顏子以能問於不能皆原於此象先問舜之大知先生曰全在這好問好察上故夫子亦嘗說好古敏求這好的意思後人便沒有前日過碧峯有個僧來見予偶過石間謂予曰玉是在頑石中別白出來的金

是在沙泥中別白出來的君子是小人中別白出來的
予謂還不是金玉在沙泥頑石中幾曾道我是金玉你
是頑石沙泥君子在小人中終不道我是君子你是小
人正如舜在深山河濱雷澤一般與木石居與鹿豕遊
全不異於野人若舜說我是聖人這些人見舜訑訑的
聲音將望望然去了誰與共居舜雖好聞一善言好見
一善行從那裡得來這等看來舜之知不全是生知在
一好字上

何堅問吾輩不能好問好察其病安在先生曰這是各有個病痛須是各人自家檢點出來對曰只是好高不肯下人耳先生曰此還是第二層事元來只是視天下的人與己若不相干涉無舜這般心腸觀舜這般並生心腸視天下的人有一不得其所皆是己性分上有欠缺處故便好問如此後來若顏子庶幾得舜的樣子觀其自謂舜何人也予何人也有為者亦若是他自是能擔當得起子思序舜即繼以顏子者以此諸生中亦有

為舜的心否有為舜的心須是要以能問於不能以多問於寡先從顏子學起

敬問中庸不可能之謂何曰天下國家可均然有時而不均爵祿可辭然有時而不必辭白刃可蹈然有時而不當蹈中和不流不倚之謂何曰和而不流者達道之正克己者能之中立而不倚者大本之行復禮者能之雖至於國有治亂皆守此而不變焉可謂富貴不能淫貧賤不能移威武不能屈何如其強哉外此雖風土之

偏者且不能而況於在人自有知愚賢不肖者乎故曰
中庸不可能也

象先問中庸却是個易簡的道理如何人不可能先生
曰中庸與易簡是相似然易便如天簡便如地這等看
來豈是易能的問舉天下國家可均三者謂何先生曰
他舉天下國家見得是窮達所係舉個爵祿可辭見得
是富貴所屬舉個白刃可蹈見得是生死所關三者最
是緊要的合乎中庸却難諸生今日無是三者只當於

言動辭受取予上做功又更切要些能得此亦便可入中庸矣切毋以其粗淺而忽之也

問夫子論強何以言中和先生曰凡學者必有個受病處如瘡疥之類一般有發之手者有發之足者有發之面目者須是自其脈絡貫通緊要處治纔易愈聖人之教人正如醫者之用藥莫不是因病而發子路剛強蓋不足於中和夫子語之以中立不倚和不流是亦對症用藥之一驗其於諸弟子皆然

敬問君子依乎中庸何以曰遯世不見知而不悔曰斯
其人與天地合德乎故夫子曰下學而上達知我者其
天乎夫索隱行怪已為人矣半途而廢者則亦不免於
為人故不至於聖耳

大器問依乎中庸先生曰依字從人從衣人之體中庸
而不離猶人之着衣而不去也譬之窮依中庸達時變
了達依中庸窮時變了是衣在人身亦可以窮達變耶
且今日有中舉不中舉極小小得失你們亦有以未中

為憂者已中為喜者纔滯心於此便是離却中庸欲不見知而不悔難矣故君子知此中庸行此中庸舉手在是措足在是拳拳服膺而不失不使少離於須臾不然猶人之袒裼裸裎血肉之軀盡露也大器問獨立不懼同否先生曰此就聖人自然而言獨立就用功而言

大器問費隱先生曰此體用分不得如門腔是體為人行是用燈能照滿室是用光是體此極言君子之道大也光舉人與天地聖人而言後又舉盈天地間飛潛動

植而言皆是道也自何處做起在造端乎夫婦能乎此便與天地聖人萬物為參伍

濶問既曰天下莫能破載以盡夫婦天地聖人矣又曰鳶飛魚躍上下察者何曰此盡之也言鳶魚之小若可破斯道也然能戾天而躍淵况愚不肖之夫婦乎故語小天下莫能破也天地之大若可載斯道也然鳶可以戾而魚可以出况聖人與人乎故語大天下莫能載也故君子之道其始也造端乎夫婦其至也察乎天地無

大無小也

易泉問盡道如聖人猶有不知不能衆人便得自諉了如何先生曰觀備道之全體如聖人猶有未盡處況不及聖人者乎可見道是這樣大的而人不可不為因嘆古聖人一個禮樂不知便往周問於老聃萇弘一個官不知便往譚去問鄭子看他是何等的心地後人猶有大於此者亦只是隱忍將就過去了便莫有個要求全盡無愧的永年問問禮問官恐是小事先生曰道無大

無小知官可以安民生知禮可以復民性如何看做小的

問鳶飛魚躍可以語大語小通否先生曰此是打做一片說得的謂道之大可載也一鳶之飛直至於天得一魚之躍直出於淵得謂道之小可破也莫大如天一鳶之小制他不飛不得莫廣如地一魚之小制他不躍不得這等看來古人滿目便見天理流行滿目中皆是道孔子致嘆於逝水子思有取於鳶魚皆是心常見得後

來程子亦是實落為這學問的他看到子思鳶魚之論便提掇出來謂子思契緊為人活潑潑地他亦不是浪說諸生今日亦須勿忘此意如在旅邸中便求所以待主人的是個甚麼道理御奴僕便求所以接下的是個甚麼道理相聚講便求所以處師友的是個甚麼道理如此等類觸處見得方是學問無間斷處故君子無終食之間違仁造次必於是顛沛必於是

先生曰程子謂鳶魚之論於學者極有力活潑潑地最

有味故子思及夫子說得鳶魚川流處極是緊切的見得工夫少有間斷便與道不相似了此所以須是時時省察不使離道於須臾纔好後來如周茂叔愛蓮花與不除窓前草張子厚聽驢鳴皆是於道之不可離處實落見得非為蓮與驢也

先生曰中庸之道及其至察乎天地而實則造端乎夫婦故須是打夫婦上做起故孔子嘗謂伯魚為周南召南若這裏忽畧了便是不能慎獨道怎麼行得去有兄

弟便不能宜有父母遂不能順象先問造端夫婦何處下手用功先生曰古人亦曾有樣子來舜處二女便是又問堯妻舜二女其事亦可駭先生曰唐虞時婚姻之禮尚未大備如夏尚忠只有此意思在裏面商尚質雖外面有些禮却猶質朴至周始禮文大備了今用之吾從周禮然於此等禮文不必推究但看他至公至仁之心他要為天下得人便以已之二女歸他九男事他故卒與之以天下設使舜果不可以理天下二女不為虛

歸九男不為虛事乎聖人有仁天下之心便不知有已
至於如此

象先問以人治人如何先生曰以人治人改而止是以
我之道治我之身無過不及斯已矣故忠恕元是我本
有的去道便不遠了故以所致責於子臣弟友者自責
其未能言行之相顧正是忠恕為道的事若說以人治
人是治別人則是自家於道尚未有得處遽先去治人
恐去道遠甚與人之為道而遠人相背

遠問以人治人如之何曰以人之道治人之身猶曰以我治我耳此謂不遠人以為道未及乎治民也故下言忠恕乃治道之方而孝弟忠信則其事也忠恕何以違道不遠也曰道本不遠於人而忠恕者推己以及人是不遠人以為道故云不遠人之道為邇也

敬問素位而行不願乎外章句以素富貴以下為素位在上位以下為不願如何曰非然也無入而不自得非不願乎在上不陵在下不援非素位而行乎蓋素富貴

以下乃素位不願之事在上位以下乃其故耳故正已而不求人斯能素位而行不願乎其外也居易所謂正已俟命所謂素位而行不願乎外也故君子失正鵠反求諸已者凡以正已耳正已者本也

象先問君子素位而行如何先生曰君子之所當治者固不外乎子臣弟友之道然人之遇則有富貴貧賤夷狄患難之不同足以變移進道之心故又有素位而行之說然素位而行不願乎外是一套的事素富貴一段

是橫說在上位一段是縱說只是恁地行去無外慕的
意且如我們做官的只做官做舉人的只做舉人做秀
才的只做秀才若做秀才時便行中舉的事做舉人時
便要行做官的事做官的又便要怎麼陞遷此便不是
素位而行與子思說的却不合了故其常說顏子簞食
瓢飲只是心無外慕故孔子恁地稱許他來設若他心
下有一毫外慕的意雖是半簞破瓢夫子亦決不如是
稱許他了邦儒因問取譬於射是怎麼先生曰舉個射

却正是極明白的了見得射不中的只好說自家射得不好怎麼好去怨那正鵠與我有甚恩讐可見君子只可素位而行纔有些外慕便不是

官問妻子兄弟之翕何以父母斯順曰父母之心如天地妻子兄弟如萬民萬物王者處萬民萬物不得其當天地之心不悅故妻子兄弟翕而後父母順

詔問君子之道辟如行遠必自邇如何曰好好把這端乎夫婦來者是道即中庸之道以為不可能矣孰知不遠

於人乃自卑近始乎人能妻子好合兄弟既翕如詩之云云則父母之心其安樂之矣蓋至是即舜之順於父母瞽瞍底豫而天下化之時也若稍有乖戾則父母之心愁慮疾苦不暇豈能順乎至若王者以天地為父母則天下之人皆其妻孥兄弟也必使無一夫不獲其所而後天地順

象先問樂妻孥宜兄弟亦只是性情上做功夫否先生曰然如關雎樂而不淫哀而不傷舜見象憂亦憂象喜

亦喜是也問父母順如何就是道之高速曰堯舜之道孝弟而已矣如舜盡事親之道而瞽瞍底豫瞽瞍底豫而天下化天下之為父子者定這等看來順父母的道理是甚麼樣宏大胡炳曰順父母便繼以鬼神謂何先生曰道是個無大無小無遠無近無隱無顯的始雖是造端乎夫婦極至便可通乎鬼神又曰恁地看來子思實是得孔子之的傳孔子實落是與鬼神相屈伸變化往來得的故予貢問人不知他便說知我者其天子路

請禱他便說丘之禱久子思非是實落見得這鬼神怎麼說個體物不遺便繼以誠不可揜敢如此說來又曰不可以夫婦為卑近而可忽鬼神即在此

衢問鬼神之德之盛者何曰無形聲而有形聲者不能離耳蓋天地萬物之氣皆理也理即誠也不然今之當祭鬼神如天地山川五祀宗廟彼真有形聲在俎豆之上牲醴之旁哉然而此心誠敬如在焉者蓋此心之理與之通也一有不誠鬼神禍之為道者豈可以兄弟妻

子為近而可忽以天地萬物為遠而可畧耶

先生因講鬼神之為德章語諸生曰學者須是學得到通得鬼神處方是實學如舜納于大麓烈風雷雨弗迷禹黃龍負舟須臾仰首而逝皆是通得鬼神處後來如宋儒程子為鄆縣簿有邀去看石佛放光者辭云適有政不暇往願往時請取其頭以示其光自是遂滅又有
一人謂曰近有奇特事問之曰夜間宴坐室中有光程子謂某亦有一奇特事每食必飽此亦不惑於鬼神者

然聖賢能如此却從那裏得來亦只在不忽妻子上做
起不忽妻子處正是慎獨就是能與鬼神合其吉凶所
謂誠也

大器問誠何以不可揜先生曰孝弟之至通於神明故
實理得於心發言中節周旋中禮可以質鬼神可以並
日月可以格祖考夫何故已心元與鬼神日月祖考一
氣也

陟問大舜之大孝而得祿位名壽者何曰名即德為聖

人位即尊為天子祿即富有四海之內壽即宗廟享之
子孫保之者耳是何也以理言之則天之生物可知以
事言之則嘉樂之詩可見故大德者必受命

講舜其大孝先生問諸生曰夫子言舜之大孝曰德為
聖人罷了又說尊為天子以下則人之法舜以盡大孝
者亦必為天子有四海然後可耶且夫子有聖人之德
而不有天下豈於大孝亦有欠乎諸生未有以對先生
曰此蓋以德為聖人為主有聖人之德矣尊富自在其

中故下言必得祿位名壽及必受命皆舉大德為先也
雖論生物栽培之理引嘉樂保佑之事皆是意耳若孔
子之事適遭其變故人惟當求盡於脩德而祿位之得
失又不可以為定例也或以孔子萬世為王名位千古
不磨其所必得又有大於舜者以證斯言其說亦通
九儀問文王言父作子述不言文王之事者何曰言父
作則有所以承之者言子述則有所以傳之者其曰無
憂者何曰聖人之心固欲天下皆入於善而其先且急

者莫過於父子故舜於富貴好色人悅之不足以解憂而嚚訟可乎真非堯之所喜也所謂子述之者如之何曰武王則不失顯名而周公又能成其德文王之喜而後可知也不言作者之事何曰舉其述者可知耳以武王為子而又言周公何周公亦武王之聖皆能述者也故曰周公成文武之德

先生曰只無憂二字便可盡得文王的心事便是能中庸也諸生問怎麼見得先生曰聖人之心但要使天下

之人皆與已一般纔好然却莫切於父子如堯舜有子
朱均舜禹有父瞽繇其千方百計諭之於道養之以善
不知費了多少心思怎麼得無憂文王有子皆聖其才
可使天下皆安安天下的心志便遂了更復何憂田大
本問淵明五男皆不肖竟委之天運如何先生曰他幾
曾有文王這心腸來

先生講上祀先公以天子之禮象先因問今日祀禮可
依古之廟數否先生曰程子所制祀禮庶幾盡善朱子

謂某則不敢恐太拘泥此他見禮文故謂不敢殊不知此却是周禮周家有封建故其子孫皆世官是以當時天子便立三昭三穆與太祖之廟而七他的適子世為天子了庶子便分為諸侯故諸侯却不敢祖天子諸侯之適子世為諸侯了其庶子便分出去為大夫大夫却不敢祖諸侯至於大夫之適子便世為大夫了其庶子便分為適士故士不敢祖大夫後世封建之制亡祖宗通沒有個祭的子孫怎麼可丟得故某之意雖是士庶

之家時祭亦當祭始祖暨高曾祖考若始祖以下高祖以上皆謂之先祖這樣的亦須歲暮一合祭但廟數自天子至於庶人當有等殺而尊祖敬宗的心却分不得貴賤故須是如此人子之心纔安而禮意纔備蓋嘗以此告武緣李白夫

濟民問武王周公之達孝者何曰達通也明也其即下所謂明郊社禘嘗之義者乎夫孝者繼志述事者也今武王周公其四時之祭也脩祖廟陳宗器設裳衣薦時

食焉其禘祫之祭也序昭穆辨貴賤辨賢逮賤序齒焉之二者是乃踐位行禮奏樂敬所尊愛所親事死如生事亡如存其志即先王之志其事即先王之事孝之至也夫郊社之禮所以事上帝后土也宗廟禘嘗之禮所以祀其先也故能明郊社之禮禘嘗之義則是與天地合其德與祖宗合其心治國如視諸掌矣能明之者惟武王周公為然故曰武王周公其達孝矣乎蓋仁不能以安人不足以格神誠不足格神不足以治人也

詔問達孝先生曰達是明也通也即達天德達禮樂之
達言惟武王周公能通明此孝道耳其孝則謂之何惟
在善繼其志善述其事而已必以祭祀之禮為繼述之
大者豈以國之大事在祀歟曰是固然但祭祀時可以
觀繼述之孝夫何故春秋脩祖廟乃四時之祭即下嘗
字也宗廟之禮乃禘祫之祭即下禘字也能脩祖廟則
非不屋者比陳宗器則能世守非抱祭器他歸者比設
裳衣薦時食則能來四方之貢非攘竊犧牲者比昭穆

咸序則子孫不至裸將他廟序爵見得天下諸侯皆來
助祭辨賢逮賤序齒則又皆懽忻流通諸父昆弟不怨
故踐位一節總申上意以見先王之位與禮樂真能保
守其志與事必如此而後為繼述之也明乎郊社之禮
禘嘗之義者正以此耳蓋郊社禘嘗之前有多少事件
皆為治國耳脩身不待說了其尊賢親親敬大臣體羣
臣子庶民來百工柔遠人懷諸侯無一事不盡故到祭
祀時候庶民得以供時食諸侯以下得以序爵親親得

以序昭穆序齒羣臣得以序事祖考之志與事於是乎
遂矣故來格而享之故曰惟仁人為能饗帝惟孝子為
能享親此也此便是能明此禮義則治國之道固已在
乎其先故曰未能事人焉能事鬼可見此孝非武王周
公莫能明也後王不能治國使衆叛親離禮崩樂壞是
棄先王之志與事而不知繼述雖有黍稷之馨以瀆鬼
神祖考亦不格矣此便是不達乎孝者辟如人家子孫
於祖考能守其基業遵其教訓大則立身行道顯揚其

親到祭祀時節雖瓜菓菜茹之獻祖考亦來歆享其或
蕩廢家產虧體辱親雖有祭祀祖考亦含恨九泉矣故
此孝字似武王周公能通明的幾人

田問孔子對哀公問政之事如何曰文武之政以下言
人存政舉之易也為政在人以下言得人之故也得人
之故在脩身故仁者人也以下至治天下國家又言脩
身之故也然脩身以道則有五達道之事脩道以仁則
有知仁勇之事知仁勇即仁義禮也以其出於性也故

先言仁義禮以張本耳夫治天下國家固以脩身為本其條目亦不可缺故下言九經之目與其效及其事而又本之以誠然皆自脩身推之也故又總言曰凡事皆本乎誠也凡事即所謂言行事道也然皆不外於此身耳然自此以上皆就君身而言其在下位而為臣者亦不可無其誠故遂以在下位者推至於明善誠身則亦不外於誠以脩身也誠何以若此之重耶誠原於天也當盡於人耳其盡之者推擇善而固執故下遂以天道

人道各發其義焉自誠明謂之性則天道也自明誠謂之教則人道也誠則明矣明則誠矣言誠明一也

詔問哀公問政一章何其言之複乎先生曰固自有序耳為政在人至知恥近勇皆論脩身之事為政之本也自知斯三者至九經行之者一皆論治人之事為政之用也故文武之政以下言立政之易存乎人也故為政以下言行政之本存乎學也然脩身事親是學之仁也知人知天是學之智也故下列達德以行達道自此開

端耳生知以下是言德之有品而入德始於三近究其
脩身之本也知斯三者以下是以身為之綱而施政備
乎九經廣其脩身之用也其下九經行之者一又言必
主於誠與達道達德同耳凡事豫以下則推論雖一言
一行一事之小亦必要誠而況於道乎故道前定乎誠
則不窮矣至此則政雖廣如九經而其本尤當以道前
定為脩身之要也問又言在下位者何曰雖在下位且
不可離此誠而況於君上乎所以深警哀公也自誠者

以下則原誠之所由出與其未誠者之功與效君臣皆同耳

王獻蓋問齋明盛服非禮不動先生曰此心齋肅儼然如神明在上雜念不生這便是齋明盛服亦不是綺羅之服乃先王之法服如深衣一般故服其服則思稱其服須要整齊不亂這便是盛服如此則有以立其本至視聽言動又皆以禮身豈不脩

問凡事豫則立如何曰凡事是泛說見達道達德九經

固當本於誠雖凡事亦莫不然也問其下何以在下位者言曰聖人不欲直指人君故借在下位者以感動之且自文武之政至不可不知天言立政必由於人存也自天下之達道五至知所以治天下國家言人存之事也自凡為天下國家有九經至所以行之者一言人存以立政之事也自凡事豫則立至末又詳言所以人存之事也故此章即大學在明明德在新民在止於至善一般觀此章有生知學知困知又有安行利行勉行可

見知行還是兩個陽明子以知行為一個還不是又曰人若能用人一己百人十己千的工夫便可到聖人地位故曰雖愚必明雖柔必強聖賢只有生熟之分熟者為聖生者為賢若自以為不能便是自棄然須要立志須要虛心擇友不然終未免為鄉人而已

應元問自誠明何以謂性自明誠何以謂教先生曰自誠而明是原初就是如此無些夾雜無些私欲所以謂性即誠之者性字一般自天生來然也自明而誠是有

私欲雜了必有所見聞而後有所得故或師友之開通
典籍之覺悟心思之擴充言動之觀法至於見一草一
木之微也亦或觸類知進皆謂之教如張子所謂糟粕
煨燼無非教者一般應元又問如此必先在明上做工
夫乎曰古人的學問元只是打知上起看他下個明字
見得元初本是明的但受形時或氣少夾雜了些且又
加幾番習染過來便與元初的本體不同了故必須在
明上起纔到得聖的去處正如一個鏡一般被塵垢汚

了須要擦磨過纔得復明又如作室一般亦要把那地基上的蓁蕪悉皆芟去方好作室故曰不明乎善不誠乎身大學謂在明明德亦是如此

詔問誠明以下亦各有屬乎先生曰至誠盡性章申誠明之性也其次致曲申明誠之教也至誠可以前知申誠則明也誠則自成而君子誠之為貴申明則誠也至誠無息以配天地申至誠盡性可以參天地之化育也尊德性道問學申致曲也此以上皆聖人之道德問學

事愚不自用及三重皆論聖人之制作度數事蓋體用之備夫子之祖述憲章上律下襲者凡以此耳故中庸之道惟夫子為能備之雖大舜文武周公之事皆一以貫之矣此非至聖不能知夫子其至聖者乎非至誠不能為夫子其至誠者乎然學者之入門亦惟自為己之誠知幾之明以求致其極耳至於篤恭之妙則所謂位天地育萬物者不外乎此矣

聶蘄問至誠盡性曰盡性即盡其心之盡此以前戒懼

慎獨格致誠正工夫都已盡了所謂窮理盡性以至命亦此乃是致中和天地位是性本合天地萬物為一原由是擴之與天地同其大萬物同其體斯謂之盡而人物之性亦在盡已之性已兼了註中知之無不明處之無不當只說得用處一邊當先有感化的意如鼓舞盡神化裁盡變皆是如堯典稱堯只是個克明峻德便可九族親睦百姓平章黎民於變時雍都了了至於治歷若采治水特餘事耳贊是相的意思如詩后稷之穡有

相之道一般參如禮謂離坐離立毋往參焉一般真個天地生這些人物非是聖人成能他却象是個虛設的恁他看來聖人真個與天地參對無愧的

詔問致曲先生曰曲是纖悉委曲處皆要推而致之使無遺欠如易繫辭所謂其言曲而中之曲如善端發見之偏兼言之亦可此是致知誠意工夫戒懼慎獨工夫亦在此象先曰如何是委曲處曰如水之千流萬派欲達江達海中間不免有些砂石障礙山谷轉折便有多

少委曲處須是悉致之纔得與江海會通昔日有二生同欲致書於其長一生適有事就免無事的這生為之封裝其生於己的封裝甚整飭於人的便覺潦草此便是不能致曲處前日初啓東來見說他場屋中一友有寒疾不能終卷他便把已身上衣服解下一件與他穿其友還不能寫又教他面向裏背向外寫其友猶不能又將兩個軍的衣服脫下來將外面遮着其友纔得終卷出看這一事便是他能致曲處但未知他每事皆能

如是否耳凡學者惟是這一灣難過須要人逐念尋究耳

王獻蓋問曰致曲有誠與聖人如何曰亦幾於聖人到物化時非己之化不及此故曰有天德便可語王道其要只在慎獨其此章之謂乎

炳問致曲是集義一般否曰致曲工夫比集義還精密譬如曾子說孝其行孝便是義說到斬一木殺一禽不以其時非孝也便是致曲孟子說集義到行有不慊於

心則餒乃是曲之不致譬如纔方飲茶長的不肯先幼的
不敢不後不相錯亂其讓的意思溢然便是致曲若
一茶之間忽畧了便不是致曲

數問至誠盡性何以參天地也曰天地亦此性耳而况
於人物乎盡則有以畢其理而無餘故能參天地耳

末問致曲之謂何曰因其發見之一端而委曲推究以
造其極理有未得者力皆可得而至之故能有誠也誠
則發見於言貌故曰形形則人皆可見可聞故曰著著

則如日月炫人目雷電震人耳故曰明

未問至誠之道可以前知又曰至誠如神者何曰上言其理下言其人也蓋禎祥妖孽之見著龜動四體皆至誠之所發見然有善不善之殊是故雖禎祥有不善者矣雖妖孽有善者矣惟至誠能知之耳

炳問禎祥妖孽何以知國家之興亡先生曰國家興亡雖在禎祥妖孽還看著龜四體上譬如堯有九年之水湯有七年之旱妖孽莫加焉未嘗見亡又如漢文帝時

妖孽甚多天下反庶富漢武帝時禎祥甚多天下反虛耗可見興亡不在此蓋禎祥有不善的妖孽有善的惟至誠能先知道故曰故至誠如神

象先問禎祥妖孽何以在著龜四體上見得曰如衛石駘仲卒無適子有庶子六人卜所以為後者曰沐浴佩玉則兆五人皆沐浴佩玉石祁子曰孰有執親之喪而沐浴佩玉者乎不沐浴佩玉石祁子兆衛人以龜為有知也此便是禎祥之見乎著龜如周公之握髮吐哺赤

爲几几漢高之攝足輟洗此便是禎祥之動乎四體故曰賢才出國將昌子孫賢族將大妖孽則反是若只謂麟鳳之物為禎祥災異之類為妖孽淺亦甚矣不待至誠能知之

先生謂陶欽夔曰近與學者論致曲凡事致其委曲纖悉合當處纔是工夫無處無之也欽夔曰誠形著明動變化與定靜安慮如何先生曰定靜安慮主在已言動變化却及乎人物而言曰動變化其在慮之後乎先生

曰然曰致曲工夫權變俱在耶先生曰未可先便說權然權亦在其中曰誠明就為盡頭曰致曲工夫就便是明之盡頭

王獻蓋問誠者自成也先生曰人心最不可不實不實則事皆虛文何以自成故誠者物之所以自成也惟有誠心為善則一家之中父母兄弟妻妾僮僕皆信你是善若一家未能相信畢竟還是不誠曰誠者之成物是知之明而處之當否曰必須那物成方是成物堯何以

不能化其子曰書曰克明峻德以親九族九族既睦平章百姓固不能化其子然九族既睦只有一子不化說他是睦是不睦故丹朱不賢不害其為成物

阡問既曰誠者自成又曰自道者何曰誠與道一理也由其在心故曰誠由其在行故曰道故存其理則成物然在心也行其誠則為道然在身也故曰自成自道誠者物之終始以下則言當誠之故非自成已以下則言誠已之大是故君子以誠為貴也

用問至誠無息以下之謂何曰無息以下言聖人至誠之功用同乎天地出於自然也一言以下則言天地至誠之功用以見聖人之同如此也詩則明天地聖人爲一惟悠久耳

詔問何以曰故至誠無息曰此承上誠者而言古本通爲一章既曰不息又曰久者何曰不息是無人欲之間斷久是天理之常存不見而章亦可以說天乎曰不動而變却說地不得不曰爲物至誠乃曰不貳者何曰言

不貳正所以狀天地至誠之景象不貳即誠也若為物
貳也則天可傾不能行健以覆物地可折不能承順以
載物只看這不貳便見那誠字做出無窮無間的事業
模樣若止言至誠則徑直而無餘味要形容那專直翕
闢的意象出來却難比正子思立言之妙也今夫天一
節言天地已盡矣而又曰山川者何曰山與水乃地中
之廣大者山水如此則載山水之地可知矣地既如此
則包地者可知矣故其下引詩只言維天之命而不及

地與山川又以見聖人與天為一雖地與山川皆不得
而比之也故自至誠無息至無為而成言聖人同乎天
地其為物不貳以下言天地以見聖人下引詩並言天
地聖人之一道也又問欲學文王從何處始曰只是從
前擇善固執明善誠身處學之詩不云日就月將學有
緝熙於光明然就將雖日月所積而顯思之天亦可至
之學者毋以日月可忽玩也

應元問聖人之治天下也有禮樂刑政設施措置如何

說不見不動無為先生曰聖人是德盛而民自化如為政以德一般非謂全無所為如舜之舉元愷但知善之當舉而已誅四凶但知惡之當去而已豈是欲天下知他舉善去惡而天下自然服他故雖見而猶不見雖動而猶不動雖為而猶無為大抵聖人行事出於無心順其自然故如此若後世為政者舉一事便要紛更舊章就是動了便要誇耀於人就是見了便要作好作惡徵色發聲便是有為了夫何故皆只是不誠

威問天地之道博也厚也高也明也已盡了又說昭昭以下如何先生曰此正是一個學天的景像蓋昭昭之多是天到那日月星辰繫焉萬物覆焉也是天一撮土之多是地到那載華嶽而不重振河海而不洩萬物載焉也是地正如人一念之誠是誠一事之誠也是誠至於配天地也是誠人能自一念一事之誠造到那配天地的所在便是無窮之天廣厚之地一般若只是那一念一事之誠而不肯進亦是昭昭之天撮土之地一般

是以學者貴乎不息不可安於自足

守德問大哉以下之謂何曰言誠之者功用之大與聖人為一也既曰尊德性又曰道問學者何曰問學凡以明尊德性耳其下云何曰致廣大則或畧乎精微故又曰盡精微極高明則或過乎中庸故又曰道中庸溫故而不知新則知無所進敦厚而不崇禮則行或有陋故曰脩德以凝道也註存心致知之分如之何曰纔存心由致知纔致知則存心一理也故尊德性豈無致知道

問學豈無存心故其詩曰既明且哲合存心致知而言也

永年問大哉聖人之道一章似是聖人之功業如此皆自尊德性道問學上作起先生曰正是蓋聖人之道大小無所不包如洋洋乎發育萬物峻極於天是天道也包了優優大哉禮儀三百威儀三千是人道也包了是聖人之道如此之大然自那裡做起却自尊德性上起尊德性又自那裡作起却要道問學致廣大以下皆

其事也前所謂致曲者正在於此陸子靜專尊德性而輕問學豈有能尊德性的道理充陸子之道禪而後可者也

詔問大哉聖人之道曰洋洋乎發育萬物是就造化言優優大哉是即人事言蓋小大皆道道器一致也故君子尊德性而道問學者何曰道路也人所由也亦有道理之道的意然言道則非道的問學非所事矣道問學即尊德性工夫存心致知本同為用者也致廣大者何

曰是自我致得來的亦兼推廣說然欲致廣大先須克己之意見克己又須隨其性之偏處克之廣大之人精微處或闊畧故又要窮理如一言動一飲食間皆有至理存焉盡即盡其心之盡欲極高明只是無欲道中庸所謂存天理近人情也問溫故屬存心知新屬致知否曰溫故一句屬知敦厚一句屬行不必規規以存心致知分也問前云發育萬物峻極於天言道如此之大此乃歸之明哲保身似覺小了如何曰到此即孔子聖之

時易之與時消息知進退存亡而不失其正皆是也豈可小者

李生問監中諸友會文出致廣大而盡精微極高明而道中庸題敢請教先生曰這題目儘大著人之德性元是個廣大的可以配得天地但人或立下意見或分著彼此或隔了藩牆被這私意一蔽了便自狹小與天地不相似了故須是不以一毫私意自蔽使亦能如天地之無不覆幬持載纔謂之致得廣大人之德性元本是

高明的可以配得日月但人或溺於聲色或雜於貨利或急於功名被這私欲一累了便自卑污與日月不相似了故須是不以一毫私欲自累使亦能如日月之錯行代明纔謂之極得高明然精微之未盡亦未免為廣大之欠中庸之不道亦未免是高明之過故致廣大便要盡精微極高明便要道中庸

問溫故知新曰溫猶燂溫正如冷湯酒一般須是得火便有生氣喫着便有滋味良心冷了却如槁木死灰一

般怎能得新意出來故修養家有所謂文武火纔煉得成丹亦是如此敦厚即書之惟民生厚記之忠信之人可以學禮一般因謂之曰就是與諸友會文之間亦便有可致得廣大的處問何以見得曰如論文已或有些好意思不肯廣與人人或有些好意思便是知取他的亦便是不能致廣大須是把這心便看做與天地一般人有善便取於已已有善便持與人方好不然恐亦還只是做文字的秀才也

汝隣問自用自專之謂何曰言聖人以議禮制度考文
治天下然而無德之愚無位之賤皆不可妄作以取災
何也非天子不可為也況今天下一統雖其自用自專
其誰從之故必德位兼備斯可作也彼仲尼有德之大
聖也惟無位雖盡學夏殷之禮而有得焉然亦惟周是
從則亦不敢自用自專愚賤者豈可行乎

藻問三重之說何以寡過曰本諸身以下言王者有聖
人之德而制三重也動而世為天下道以下言寡過也

詩則證之耳蓋非若上下雖善無徵不信而民弗從者也動行奚別乎曰動以其損益制器而言行則周旋容止之謂也何以言仲尼也曰承上言此道惟仲尼能盡之耳蓋其學也兼帝王天地之道而時出之則其德如天地之無不覆載而四時日月之錯行代明也惟天下至聖德備諸已而時出之化乎人以配天也孔子其至聖乎惟天下至誠經綸立本而知化育由與仁與天與淵為一也孔子其至誠乎蓋自舜之大孝至此皆所謂

脩道之教而孔子為獨聖也夫焉有所倚即其下所云也

威問三重之制如何先生曰三重非聖人胡亂制的本諸身之有德又驗諸民之信從然也永年問考建質侯是後人替聖人如此說抑是聖人自如此曰是聖人自如此然則於天地何以言建於鬼神何以言質曰天地有形以此叅彼猶立標於此以求其準也故曰建鬼神無形以心質之乃以明格幽而與之合也動而世為天

下道以下正說寡過又問三重之制既本諸身有德若民有不信從是德猶有未盡民若信從使考三王而有謬建天地而有悖質鬼神而有疑俟後聖而有惑也是德有未極曰然問君子動而世為天下道曰此動字就損益變革上說如說兼言行則重複矣非子思本意下言知天知人者何曰天之理不外於人人之理皆原於天知人則知天矣言至於知天則理無餘蘊

詔問仲尼祖述堯舜曰祖述堯舜只自二典觀之可見

憲章文武觀於論語亦可見是蓋學兼古今矣上律下襲則天地亦兼而學之可謂貫天人之理於一身今學者言及帝王天地便委靡退怯不敢自振以為終不可學皆由志之不立而不能以有為也

象先問仲尼之學必兼天地帝王者何曰看孔子的學問是何等樣大後人雖有知古的便不能知今此或流於腐儒雖有知今的便不能知古或拘於曲士知天而不知地便是能員而不能方知地而不知天便是能方

而不能員酌古準今參天兩地這便是聖人的學問若
賢人的學問便下聖人一等了一生曰今人連賢人的
學問也到不得先生曰這却趨下了在汝雖曰謙之至
他人視之便覺自畫之甚矣夫帝王天地於我豈有遠
耶問聖人之道恐亦只是賢人的學問做去先生曰元
來規模自是不同

詔問小德大德曰此言德之有大小也自夫子身上說
即如當時列國諸侯及門人弟子鄉黨宗廟朝廷隨其

所接所問而應答作用各有條理即小德川流其統會之地原於一心經綸之妙變化無窮即大德敦化一以貫之亦此也宜以夫子對造化同看方好

敬問衣錦尚絅以下者何曰言君子作聖之功也夫聖雖可學非有為己之心與知幾之資者不能進蓋纔為己則誠之本也纔知幾則明之本也然後可以用謹獨之功矣蓋無為己之心則不能為謹獨之功無知幾之資則不知獨之可畏也故君子於人所不見之處而欲

無惡於志惟在不待言動而常信敬耳夫如是則無言之誠雖神明可通而況於民乎又何賴於賞罰哉是何也君子有不顯篤恭之德百辟皆化而天下自平雖有賞罰無所用之然所謂不顯之德者亦非玄遠也即天命之性耳但其妙至於無聲無臭諸詩不能形容也

易象問子思言淡而不厭及言知遠知近等語恐又加謹獨工夫亦只是如此先生曰此只好就資質上說如淡而不厭見他是個有入誠的資質了知遠之近見他


是有個入明的資質了纔好加慎獨工夫予前日亦曾與鄒東郭說來聖賢說話亦有不曾一句就說盡了的如首章言個戒慎恐懼的工夫可位育得天地萬物了然下面便繼以智仁勇又繼以九經五達道又繼以誠明然猶必須要個好資質纔做得這工夫又說個慎獨中間便自有許多條理不然只一句說了下學怎麼得個下手的去處泉曰何不一下說了曰恐諸君就不肯用功夫也

王材問君子之道淡而不厭簡而文溫而理知遠之近知風之自知微之顯先生皆以資質言恐不皆有此資質亦要學力也曰是資質無此資質者却要學力先變化氣質也故學要為己為己誠之基本也然雖是為己而無那明亦不可故又要明知幾明之基本也知風之自三句最好體認風是甚麼的風譬如外面有個毀的風便知道這是我那件事做得不當外面有個譽的風便知道這是我那件事差強人意知得此纔能不怨天

不尤人却肯慎獨做工夫也

王材問不動而敬不言而信有記先生言者似謂君子之誠不可揜不待聽其言見其動而敬信自著如此則皆自他人看君子言恐此節是指君子用功言先生曰是此是子思言君子欲平天下打那裏起便在獨處慎起慎獨工夫非一朝一夕之故凡一言一動無時無處無不戒慎至使家人奴隸皆曉得我的心事如易所謂邑人不戒都不待警戒他他自是信服我到篤恭處便

是天下人皆信服我了謝顧曰篤是慎獨工夫不息先生曰還是篤厚此是到至誠無息處自然功業博厚高明悠久配地配天天下如何不平



四書因問卷二